

Mas stampia nobo di servicio postal di Aruba

ORANJESTAD (AAN) – Den su edicion di ayera DIARIO a trece e Informacion Filatelico for di SERVICIO POSTAL na unda cu e stampianan y “first day covers” di su edicion special: „DEFINITIVE STAMPS III 2001”, emiti for di dia 31 di Januari 2001 caba, a worde publica y awe ta continua cu e siguiente informacion filatelico:

“Den su edicion di ayera DIARIO a relata encuanto e tipo di stampianan emiti cu e cuatro diseño tipico di algun di nos parha cu ta reflehá un parti nos cultura ademas. Nan ta:

E Pushi, e Tortuga, e Coneu y e Prikichi diseñá artisticamente riba e stampianan valora na, di 5c, 30c, 50c, 200c y diseñá pa Sr. Nigel Matthew.

SERVICIO POSTAL ta informa tambe cu nan siguiente edicion di stampianan, diseñá pa Sr. Ramyro Lemminga lo worde edita riba dia 26 di Maart 2001, y lo ta e:

„CULTURAL STAMPS 2001 (40 añá Mascaruba)”

E dos (2) designacion lo ta como siguiente: 60c y 150c, y e costo pa su F.D.C. lo ta Afl. 2,85.

Den su edicion di awe, DIARIO ta trece e siguiente informacion cu ta trata algun informacion di e CONEU y e PRIKICHI ambos bon conoci y stima den nos comunidad y diseñá riba e stampianan.

E CONEU – Stampia 50c

E coneu nativo di Aruba, yama “coneu” cu su curpa shinishi, bruin a habita e isla pa centurianan, pero semper a biba den selvanan.

Ta mas probale cu nan a ser treci na e isla aki pa e Indionan for di Zuid America.

Hopi ta e discusionnan encuanto procedencia di e “coneu”, si ta for di un liebre of un coneu mes el a evolucioná.

E diferencia entre nan dos ta cu e cria di e liebre ta nace completamente cubri pa lana, cu wowonan habri y capaz di core algun minuut despues di nacemento, unda cu coneunan ta nace sin lana, ciego y indefenso den un neishi traha specialmente pa nan cubri di cuero.

Sinembargo, e coneu ta biba entre barancanan y den buraconan hundo den tera, pero e constante crecimiento di e poblacion y e aumento di construccionsnan a bira un menaza pa su habitat!

Contrario na e coneu nativo, e *Oryctolagus cuniculus* Linnaeus cual ta e nomber na latino pa e coneu domestico Europeo, a worde importa den e di 15 siglo pa e Spañonan. E cria aki mester worde cuida completamente den haulanan. Nan lo por ta cien por ciento vegetarianonan, pero nan ta gusta un tiki pan tambe of “maish’i rabo” de vez en cuando.

Mester provee nan cu awa, pero na mes momento nan mester worde protehi di serena y awa.

Coneunan ta mascotanan suave y tierno, inmensamente stima pa muchanan rond mundo.

E PRIKICHI – Stampia 200c

E Prikichi Caribeño (Aratinga pertinax) mihor conoci como “prikichi” ta relaciona cu e lora.

Nan ta mas chikito cu e Lora Caribeño y nan tin un rabo mas largo.

Hopi interesante di e parha aki ta cu ta existi un diferen-

cia den raza na tur isla.

E “prikichi” Arubiano tin un cabez color berde maron cu un tiki geel banda di e wowo. Na Curacao henter e cabez ta color geel cu excepcion di e corona, mientras cu na Bonaire e corona y ta color geel y tin biaha e nek tambe ta geel.

Prikichi ta come e simiya di e matanan di hubada, kwihi y watapana, pero tambe tur sorto di fruta y drado di cactus. Nan ta bula den grupo y ta haci boroto y gritamento. Aunke ta parece straño, hopi biaha nan ta nan ta escoge neshinan di comehein den matanan como nan neishi, den cual nan ta coba un tunel

y na e salida final di e tunel nan ta traha nan neishi, te hasta cu e comeheinnan ocupando e estructura.

E desaparicion di vegetacion sin pensa andando den e temponan aki ta causando cu un cantidad di neishj ta desapareciendo. Pesey, e prikichi ta birando un especie exponi na peligro.

Apesar di esaki, nan ta parhanan masha popular y

por worde domestica como mascota.”

E stampianan aki ta obtenible na Servicio Postal na San Nicolas, Noord, Royal Plaza, Piedra Plat y Oranjestad y a cuminsa for di dia 31 di Januari 2001 y lo ta obtenible pa un periodo indefini.

Por haci pedido na SERVICIO FILATELICO na Servicio Postal na Oranjestad.

TELEFONNAN DI DIARIO
826747- FAX 828551